

四庫全書

集部

欽定四庫全書

跨鼇集卷二十七

宋 李新 撰

小簡

與趙運使

某皇悚再拜上啟運使朝奉先生冬曦比晴人意健利
緬維行臺決事坐通神明索智於囊同水中月山川百
靈佑我賢德以為太平之基體力泰定日享如茨之福
某客舍無聊不能出門戶阻遠師席臨風馳情謹具手

狀候問不宣某皇悚再拜上啟

再與趙運使

某皇悚再啟候承台履庀在前幅禮文脫略恐懼惟甚
三伏劇蒸恭惟道德隆峻忠孝備全使事佚安上承天
休某僻在支郡拘於猥藏未獲參侍台光伏乞加保樞
要冲氣為和前膺延閣之拜某皇悚再啟

再與趙運使

某皇悚再拜霜序薄寒玉節遠使蚤暮有渡瀘之期行

到水窮坐觀雲起蒙犯跋履處從者良苦比辰興居如
何自此以南氣候小異行厨盤餐要當及時祓除烟嵐
杯中之物亦自有聖受命飲冰固古人之高節而愛身
為國亦人子之大本飲食次舍伏望崇祕惟先生屬意
毋忽此下吏區區之情某皇悚再拜

再與趙運使

某皇悚再啟蠻夷向化詩人歌之稽首願為州縣此太
平盛事且闢國百里古以為異今夷獠所獻幅員之廣

何但百里耶主上遴擇忠智之士以寄此行蓋體職不輕而先生首被委任是中足以立功報國昔唐蒙通夜郎國至驚巴蜀最後相如檄喻父老宣布天子威靈德澤盡所以懷遠之意而西南邛笮冉駹斯榆之君皆請為臣妾方今聲教所暨薄海內外車書混同際天所覆彼西漢固不足道然開府求人正其端本得一士賢乎長城惟先生留情於茲某率易強聒安所逭罪某皇悚再啟

再與趙運使

某皇悚再啟自去秋徂冬歷今春度夏先生出入夜郎
勞苦萬狀某所親見聞主上眷倚之重先生不肯辭難
築城純滋茂績昭著所仗忠孝雖山川險阻蟲蛇窟藪
中天地神明陰有隲相安樂無事如在燕閒後日陽報
福祿綏之殆未始有艾也消并戎南建築計在秋末須
雨水定貼始可興工增秩賜章芸閣美名朝暮席拜行
寄謁者之賀艱日方暴敢惟為道加護以垂福天下某

皇悚再拜

再與趙運使

某頓首再拜前月末歸至普初三日已定割職事抱律
書與俗吏議重輕欲文無害而已官况蕭條差厭不樂
幸而際遇先生提拔令筵與功賞秋冬間僥倖脫此以
去實出望外楚阜之禽不飛不鳴久矣飛而冲天鳴而
驚人自今日始敢不砥礪後圖以荅知遇某頓首再拜

再與趙運使

某頓首再拜某元豐末居太學凡七年公私試補薄有
聲稱既忝冒入仕謂功名唾手可取凡二十年官學如
退鷁歛板趨庭與參軍文學為伍俛首汗洽似不知命
重念某起身白屋父死未葬母年七十餘萬一出選調
可以鈎致一命以責泉下之人為堂上晚景之光一身
遭遇存歿受賜伏蒙先生憐其阨久先眾人推挽差委
職事試之煩難某稟賦拙直幸逃弛曠之罰而受獎與
過實筆端春華點化腐敗起再生之榮言念此恩死不

敢忘因書輒布干冒清視驚恧何窮某頓首再拜

再與趙運使

使堂貴集伏惟均受明福令嗣機宜荆湖就親昨云六月已後歸來是時峽江方漲不可泝流僭率上覆仰乞
照亮某皇恐再拜上問

與瀘南安撫

某皇恐頓首再拜安撫太尉先生舜絃橫膝南風可歌
一襟清微自堪解愠伏惟履茲炎序燕處超曠鎮撫百

城萬靈眷佑保我師率日新之祉與瀘水並長下情欣慰某前月未到普此月初已交職事乍遠台範此心搖旌仰冀為道加護使相之拜可立而待謹具手狀候問不備某皇恐頓首再拜

再與瀘南安撫

某再拜上啟某祗後新疆苟攝支邑實隸廉按拙不更事但知有愛民而已既築純滋二州脫迹以歸一杯藜藿安樂清靜始覺夏日之長回念前日勞苦正如痛定

時愈遠台誨積有傾嚮曷勝馳情某再拜上啟

再與瀘南安撫

某惶恐再拜某還任一再旬遍體瘡痍捉筆不得以書
未獲奉典謁之間慙慙可量投俗亡補日摠司空城旦
書與牛吏議重輕辜負所學祇自羞覩何時侍師几紓
此宛宛臨風不勝傾馳某惶恐再拜

再與瀘南安撫

某悚息再啟前月末提刑刑部過合江南溪兩處參集

及過普慈甚歎曲頗蒙獎借自惟聲迹么麼不聞於時
何以得此此必太尉先生吹噓餘論所及至感至激然
某止欠二削今冬當滿因吏更乞借片言之重俾遂湊
合下半年得便了當脫去選調出自門下恩德非淺也
干冒台聽尚布照亮幸甚某悚息再啟

上漕使

某惶恐頓首再拜即日春和恭審某官導青陽之政使
事依仁入奉几杖之歡承顏養志坐通神明天監甚邇

報以景福永錫難老有識者逆知其如此某初至武信
阻趨函丈伏冀為道愛身報親與國區區敢畢下情不
宣某惶恐頓首再拜

再上漕使

某惶恐再啟上百嘉向榮緬維臺府虛靚和樂飲酒登
高賦咏盡春臺之樂理財稱物以平為常列城十六共
戴德賜某今日祇服賤役正阻稱謝跂望恩闕不勝馳
情某惶恐再啟上

再上漕使

某惶恐再啟某竊謂士有貴賤事親之心無貴與賤某
淪胥十三年不遑將母覽西山之勝日哦陟岵之詩心
搖若旌涕零如雨慈母嗟季留情故鄉今方肯來奉一
杯藜藿其樂詎算仰惟先生以孝行高世率俗純厚幸
推愛親之心以及下士教其不逮貸其不敏函容保護
俾若漸進之鴻自是以升則某桑榆之景拜先生錫類
之賜尤不敢忘也某惶恐再拜

與馮德夫

某再拜德夫賢弟秋熱不耐亦蒸燠詎堪忍道人得安
樂法自有清涼處長健利不某謫廢偶在善地僑寓義
鄉禮域日親賢士聞所未聞鄰比巨族如依大木被廣
蔭忘所為遷客遂神交道悟又有吾德夫至於以所有
資所無猶是末邊事三年遊從一日別去豈無情耶歸
來山谷幾半歲五窮百憂共卧起但老母康強飲酒食
肉無一根齒搖落此樂不散敝廬依山時時掖老母登

高指烟雲明滅處正前日羈管所軒然一笑如舉夢中
作幻相耳昨至錦官會鄭六送女捷為墓詞未取然已
見楊祐夫許作跋尾賦詩寄去奇老計安因燒香附問
自馮博二大夫而下不曾有一字繼當馳一介行李布
謝恩意王才卿到家否命壓人頭奈何奈何某當自吏
部注差遣來若非山郡監征即村縣少府末由承集幸
以道自牧順俗加護某借崇寧一席地掃洒藏拙養病
安貧守分而已無可為人道者謹啟某再拜

與馮德夫

某拜手啟初不知出脚至錦官覽清札佩意與義甚渥甚厚昭覺老子為人抵力抖數前日掠虛一味實頭留取馮居士一兩重警化公案三十年後當為流通寮舍寒冷客況如何珍重某拜手啟

與馮德夫

某再啟比附逋有書與王才卿計日今已到矣歸山貧甚無以報也慚負慚負遣一僕至彼批書可令託宿馬

棧中數日向輟騎老馬歸跨幾年矣以旋屬多終賣不行惟僧家不論此今送還似不順且宛轉為某謝之其他不較一切惟命馬無他損特膘稍落微磨破耳某再啟上

與馮德夫

某再拜西風歛來殘暑自却北郭道人涉此商序氣韻益爽別幾年寂子佛法又變否自愛自愛某再拜

與馮德夫

某頓首朝服伏諦佳況曩辱命令撰尊夫人墓誌某詞
厓罷不能發明懿行謹專人上內不煩垂訪也謹啓

與馮德夫

某頓首煩蒼頭往來慚覷十倍恐有剪紙之疑始拜嘉
命蜀契三十字已領須面重謝某再拜

與馮德夫

某手啓復勤清牋徜徉難報更苛辭定致疑左右謹已
祇受感媿并集後日賓客之懽不至破琴煮鶴矣餘待

面謝謹啓某再拜

與馮德夫

某頓首上別幾月傾孤風高節十倍於他人盾日橫甚
家居如何結衰足於一堂之上馳寸心於萬里之外閱
租簿刷舊欠所得審多山僧乍住持小院城隍下人事
佛法相半醯兩罌助調菜有飢集請疏示屬發書無因
縷細珍重某頓首上

與馮德夫

某嘗有函札修問顯道不知到否蓋與德夫書同日發也別後燕居諸況如何於道更精進否龜壁漸長成力教之趙德孺學子如何才卿已到家目疾減否三舍復行吾弟入規矩中遊否陳大中無疑成貢不及上狀致意某再啟上

與馮德夫

德夫承墨妙多謝意愛暑氣迫脅如酷吏猛虎道心清涼自是水晶國土山僧掃洒小院於天人無補梓人痛

貧士子饒舌傷弓之禽聞弦墮地蒙教不到處感服感
服摩登伽女隨子見處枯木倚寒崑猶是未了漢但請
鑽龜打瓦畢竟團量不著珍重某再拜

與鄭明舉

某拜啟驛囊有書奉寄曾收否數百里音聲遼邈懷想
無已秋老氣骨爽健否承集未期為道持護不宣某拜
啟

與鄭明舉

某再拜言某病狂易敢以亡母銘誌上累公正以締交
有素公之銘吾母宜也不敢請之他人他人不宜銘亦
不能銘無易公之銘吾母宜也是以有請今迫塋期石
已礪矣書者和墨解衣磅礴以待工治罷拱而俟之越
月矣願早見賜當扶力詣謝某再拜言

與李顯夫

某皇恐頓首再拜監茶承議族叔某流浪久為隴西士
大夫之辱慚覲有負故書問屏斷借令盡禮亦相濡沫

耳不若相忘於江湖也。赭日暴甚，興居如何？舜絃橫膝，南吹可歌。道人心源清涼，便是水晶國土。要且順序保千金軀，謹啟某皇恐頓首再拜。

與李顯夫

某再拜上。啓隆暑如猛虎暴，吏亡可遁，避處棚口依山西嶺，積雪亦几案上物。奉承公餘燕處，超然想見清涼登高所賦，能傾倒惠教否？某再拜上。啓。

與李顯夫

某皇悚上覆某少意千叩伏望垂答某前年為武信馮秀才作一墓表其文固俚俗馮生必欲得吾叔妙札為榮某亦欲託此以傳遠今數百里走人函典謁幸吾叔借其餘光特為一揮以塞馮生之志甚大惠也碑材已有佳石敢告留意幸甚某皇悚上覆

與李顯夫

某再啓上覆與吾叔漢上會遇良歎別後多難徃徃出意外但未死耳他皆不足為辭徃歲來錦官明舉約遊

西山固欲上謁竟為世諦事奪今無復如志也八年閒
居筆硯未始廢繼當附確便請教次某再啟上

與仙集

休京師博士處時有安信美除臺閣可指期也潼川凡
委一一乞疏示糖水一簋輒浼清席直孺已到京矣收
書否某再拜

與仙集

某頓首奉簡勝牛馬走尚未報命以拜教札之賜負暄

承起居蒙福殘年強飯自愛不宣某頓首奉簡

與仙集

某頓首再拜老憊氣息憊憊不耐寒暑及秋初有生意
閒居廩稍不繼琴書入臬子家矣今春獲麟遂絕椽筆
命名奏雅頗岐嶷端麗不似厲之人時時閉關弄雛舐
犢自有真樂廟記祇寄公一本極厭山城思跨一騾東
去如何比辰佳否珍重某頓首再拜

與陳子明知縣

某頓首啟子明賢舊雨涼體力健不某初解驂小窳未
黥使節款留城市未能掃地布席揚一斛以相酢今尚
慙負字一雷土動多得能聾老昏疑信相半及親見之
道路之謠真不欺人賦先期攷版籍無一錢逋負他邑
所不逮者皆此類也未承集間珍重不宣某頓首啟

與陳子明

某再啟小寺未經大風雨摧圯數處市少材料均煩諸
邑若蒙應副使全家脫顛壓之禍子明之惠豈小小者

耶徑寸雖大無嫌條段以多為貴不罪初到便爾干擾
皇恐之甚帛收受訖有紬更告撥來赳起秦亭綱有委
誨無外某再啟上

與陳子明

辱牋之惠審聞清况王賦地征如役鬼神何其速也即
時收矣更有州城委幸願旨某頓首啟

與陳子明

材植早蒙指揮般至欲便修完一入秋則推仆盡矣如

子明風力決不肯同俗人等第應副耳某再拜

與陳子明

糾察至漢初發數事諸劉已到若送右獄往往煩公移治月餘或不欲即與直仲言之某再拜

與陳子明

辱誨語諄勤感服無量暑極矣道人冒次自有清涼寶山比辰佳否繼續即時收訖有城郭委集幸垂示不宣
某頓首啟

與陳子明

竹木前諸邑到更獲羨材何以報公但增感激漢初事
已盈狴犴而巴川告訐行充囹圄回視子明百里真華
胥國也皆宰字者平日恩威相濟使斯民遷善遠罪其
效今見矣某再啓

與陳子明

某頃首秋暑體力佳不前月五馬令本曹供諸邑地契
稅虧額惟使邑欠最微判申漕司兩日前令鞠官吏不

以財用為意如子明賦輸皆先於他縣若一例被問是無神明況所欠公磨耶可便收簇了足解來為佳公移紛紛正敗人清意耳某頓首

與陳子明

荐蒙書誨仰見締交獎與之勤工徒如數十六日到凡七名更兩日放散矣十七日晚先撥前解匠四名歸小可興修全賴應副一任安然避風雨皆大賜也地契稅不多了足申來為佳一被問即礙批書然合州文法不

密老墮者之便有委不外夕稍涼佳不謹啓某再拜

與陳子明

某頓首連陰雨極不快有佳況不何時受代代者有來期不巴川已被劾新明來權漢初銅梁歸任兩邑之民欲挽而歸欲借而留不知允叔何以得此合之才令尹何其多也要見錢糴利州米告旱津般至州餘惟自愛不宣某頓首

與張無盡

某祇肅再拜上啓某竊惟自漢以前蜀人之仕無可考
獨何武入為三公已千餘歲今大丞相秉鈞澤及四海
蜀人詎得而私之然泰階之光下燭岷峨蜀人之仕者
灑然相慶先生首進必引類以同升西南英流不以入
氷鏡福莫長於薦士惟先生屬意無忘某祇肅再拜

與何文縝舍人

某頓首再拜逆旅湫隘如狗竇蝸殼神馳心焦幾不可
活延閣貴人已荷臣力豈不欲速成之但有未安不可

強耳情迫急不得不強聒左右願為留念得貴人一言
則黃閣章飛騰矣不宣某頓首再拜

與子文

某頓首子文學士比覽書席顧陶泓無佳者執事不謹
亦敗人清意妙年渡鑒頤津有漁師示此石自言夕見
光芒所記其所得之以心從某遊三十年時能吐好語
某不調辱之久矣是物呈露固有所屬敬以奉之足下
願吾友愛護之決能見百十中書公老而禿也茲石有

用非真長二小山之比不靳數語作一段奇絕如何如何某頓首

與飛聲

某頓首啟飛聲議郎老兄潼川邂逅俱勤國事雖數相見未嘗款別後不審體力健不伏惟天祐賢德日享如茨之福未緣承教伏乞為道加愛不宣某頓首啓

與君接

某祇肅再拜兩日前司馬平仲過普款聚數日聞與君

接兄數通信承知道力益健甚慰懷想尚留普慈活升
斗空山寥落幾無可與晤語者李中孚來此權安岳三
四月近又解去風之斷蓬水之木偶彼此莫知其底止
也餘俟見日併悉此懷某祇肅再拜

與去病

某頓首去病推官奉議友暖律孝履如何邑中數日之
集蒙直諒多聞之誨甚多某到家丐罷上司未遂所請
此亦命也致仕文字如未欲來專為辦集有委屬無外

不宣某頊首上

與縣宰

某頊首啓近境間令尹知是吾錦官人叩姓氏廼知有
事契晴暘健不某趨塵蒙垢願受振衣彈冠之賜若行
衙未有要官占能做一宿否謹布覆不宣某頊首啓

答山水老人

某頊首啓稚亭老友蒙牋何勤衰老情欲今非昔形要
山水詩他日當寄都會客冗復簡太踈熱甚倦否不宣

某損首啟

欽定四庫全書

跨黿集卷二十八

宋 李新 撰

祭文

開穴祭北斗文

竊惟相視宅兆制昉周官若堂若斧之封必慎視厥陰陽非求利益祈魂魄之安寧也人子臨親喪敢不自盡某躬走萬山還至西郭渴甚下取水飲見馬鞍西丘有佳氣象躊躇四顧探腰間霹靂木以定四維遂卜西丘

正兌當酉屬辛眷土為宅將奉亡父母以歸藏地理家
相眠咸言吉用之不疑土脉絕紫膏潤如截肪水逶迤
由戌入巳蜿蜒出巽兌山之狀如偃月若身運兩臂左
至艮右至巽皆拔起相望是輔弼生于母曜分為福祿
巨門貪狼森為旂門如飛暈如老蛟猛兕蹲伏而驤其
首巨鼇扇鼎天矯欲戴仙山以遊艮之一土巽之一木
生氣還還無有窮盡乾坎不見山而坤離無山前列几
案面面有朝揖甲乙二山葱蒨明秀拱立扶衛而卯山

居中祇肅俛首以聽命於允寶曜光於武曲積翠化為
金龍吉還四臨無一芒之燭火一涓滴之游魂明堂平
治空曠崦嶮隱車馬萬牛卧服有處所或曰是生公輔
某曰瓦棺石槨幸不潛於地下土宮泉臺神安遊乎其
中過此不知也又曰西來之崗謂後無擁從東南少闕
則不利長子某曰蹇陋寒乞身已爾福及昆弟又何悲
耶叔子折臂誰測其方來彥洪含笑不疑於遂事今以
某月某日塹地謹用祭法謝北斗惟三辰垂祐山川原

隰林木泉石之神安靜勿怖懼樂以相予事

代遂寧知府到任謁廟文

惟神垂祀千禩迪禱一方風馬雲車昭格上下某祇承
明命俯守茲土幾與神共治祇謁云始罔敢徼福十日
五日一風一雨疫癘不作歲約有年相春臺之熙迎化
日之長職神之功郡刺史賴焉

又築城告諸廟文

梓城歲久弗治摧圯十七八風雨剝蝕斷裂坍塌樓櫓

飛觀在者無幾皇帝命某等統其事築而新之某等祇
奉聖訓經營卜度夙夜趨赴靡敢怠遑分職率屬凡四
十員興徒三千封土構木雷聲而雲屯欲不日成之得
以緒狀聞于上惟神安靜勿擾無出其靈響開日景之
晏溫俾無鳴條破塊之虞以相我後事

寒時漏澤齋醮文

發政施仁春回萬里掩骨埋骸澤及九泉仰憑慈氏之
秘文廣濟夜臺之幽魄永以為報死而有知伏願卜世

卜年等天皇之百萬千歲允文允武小姬周之三十六
王然後旁及無垠上窮有頂含情水陸俱獲圓通

崇祭文

歲月日辰具位某謹遣某官修崇禮致祭於城之北門
自甲子日以及於今凡我邦人病雨之淫后土莫乾天
多沉陰蛙生於竈鵲鳴於野凡我邦境大田多稼河渚
涯間不辨牛馬害於梁盛守吏之憂凡我四郊歲約有
秋將誰咎焉元冥是尤漢山歛雲漢水藏蜃召我義公

徐馭其轡有脯在頭有醕在瓢出此陰氣令不崇朝

謝雨文

去歲淫雨害穀而秋亡所歛故自春徂夏物價軒涌迨
今不少低某來牧茲土適丁是時風俗病憊生意蕭然
惟祈有年以與之休息此長民者之心夙夜拳拳無以
易此不欺於上下神祇四境之內田稼秀實比愆時雨
用是干神聽既獲賜矣則守吏曷敢忘報

求晴文

天作淫雨害我田穉彌一再旬麥禾盡偃農不得事鬼
不食新商旅不行蛙生竈戶宮架以炊守吏失德播苗
千里日夜祗惕靡神不宗維神國中之望慘舒陰陽妙
萬物而為言裂屏翳之旗拆元冥之車械北澤之虹扶
咸池之日散積陰以為穌反凶為豐守吏具三牲之力
蠲日以謝神俯聽之無忽

祭龍洞神文

年月日具位謹遣某官致祭於雞翁山洞龍神之靈因

為詞以祝之曰天子有命俾守茲土誠憂而懼我旌既
彤我車既攻我來自東造國之境徵民之病將以自警
日久不雨旱魃流災始惕其來不雨伊何亢陽斯赫誰
佩其責有山嶷嶷有石離離有神司之磨崖千尺下倒
蒼壁山鬼窮役洞呀無垠幽陰悽辛龍潛其神夙與神
語十日而雨神不我拒豐隆揚旗元冥鞭螭雨彼公田
遂及我私徐州刺史有百里嵩傳車所經零雨濛濛開
元御史有顏清臣奉使而雨謹生郡人繫神之惠浹沐

千里守吏有慚無以堪此歲決有年下民熙熙龍耶神耶神耶龍耶何以報之

祭年先生文

紹聖元年十二月三日三隔山下舉葬故北海先生三九丈輜車肅駕之前日門生蜀州江原縣尉李某敬遣人致祭於先生之靈因為詞以弔之曰惟公之賢其惟鬼知末路悠悠有生奚為天之未喪道之將行庶幾斯文警我後生方時妙齡登高能賦說詩解頤疊疊到古

觀眉宇間月露孤爽四圍溘埃不入方丈遇不當意虎
兕其氣自然俗物稍稍引避煙死曲冥疑甌飛塵我知
我公曾不病貧醜見百鎰心焉鵲鵲我知我公非私其
身公之文章鳳之羽翰公之孝友為芷為蘭蘭陵有書
未得其傳汾陽有琴或絕其絃已而已而予未能無怨
乎天者耶恭維尚饗

祭宋夫人文

惟靈月窟之遊星橋之歸回風雲旗去將何之昔立厥

配有美一人登高能賦擲地有聲言念君子溫其如玉
叅仙客以登瀛繼相如而諭蜀龍生龍子鳳生鳳雛板
輿周流越王故君采石青煙碧梧疎雨魂兮不來往朝
帝所悵香輶之縹緲指閨苑以容與彼美人兮驂青鸞
而延佇尚饗

哀詞

弔安康郡君詞

并序

元祐己巳某識周彥於魚鳧市門語久意合明年春周

彥具書幣來致某欲以文相會館某於華萼周彥昆季才器行實邁世遠甚友某則屈則辱安康君與周彥商彥幾以某為兄子數旦旦禮遇有加是年秋某以書貢春解褐衣通籍士部今二十三年矣一飯之恩某拳拳不忘況厚於此者政和癸巳八月庚申周彥商彥奉安康君祔朝奉公以葬行李來告道遠後期某伏在苦塊不獲挽輅車雜吹簫歌士之役臨窆窆一慟而訣癯毀抱恨因為楚詞以弔其詞曰粵吾浮海右以歸兮遘弘

夥以宅身酷疾下流兮絕頑譎而匪隣決雲迎日兮倘
佯乎中野鳳凰迴翔兮鄙叢藥而莫下排閭闔兮吾有
待而與俱世無知兮暱忠智以為愚倬安康之五圃兮
植連壁以騰光亶緹襲之重綬兮猶韞櫝而厚藏追琢
成章兮可禮乎帝鬼欲賞題而稱呼之必聯燕趙與韓
魏蹇昔載司南之車兮以荆和而驂轡疑安康而矚觀
焉卒驚異而立志匹夫懷之者雖亡辜而棄市爰珍物
之震動兮不可掩也已彼銀潢之疏派兮貫軒轅之上

流窮崑崙而適通兮墮機石於塵溝探金穴以佚生兮
幸侈足而焉求監許史之前轍兮鞭中服以增羞從夫
予以徐騁兮駕德義以為馬願西南之足樂兮何必懷
此都也信婞直以上達兮廼種蘭而當戶夫子終蹈危
機兮亦捐甘而攻苦履世路之多跲兮悲滓穢之霑綸
俯清流以濯澣兮處無爭於谿山既一視而均仁兮忽
忘言夫久假約白首以同歸兮倏夫子之先謝燭薰劑
以抒誠兮屹南山而詎移眦靈懷如有見兮亦恍惚而

聆之矧有子而堪負兮將並穎而芾林竟復好爵於昌
明兮伸憤魄於重陰事夫子而無忤兮下報於九泉命
豐隆扶輶兮歛追遊於列僊夕觴於瑰宮兮竚萬舞於
鈞天瞰震旦之蒙囂兮一揚蓬而百年念函鼎之烹潔
兮蹇嘗价於上賓佩珪母之清鑒兮恩促母之籲貧俛
哭於水衡兮攬風木而歔歔嗟前觴不同兮邇又絕於
地維竭涕泗而亡已兮河如帶而海暴倪自今侶王孫
兮與無窮之至悲者也

贊

亡室王夫人真贊

夫人姓王名蘭字友芝一年三百六十日病一日不病
即清齋事金僊愈於事鬼讀其書不知其已賢哉若人
今已矣

欽定四庫全書

跨鰲集卷二十九

宋 李新 撰

碑文

永懷廟磨崖碑

鄉之貢士王由與予弟斤薦以書來言朱使君東漢時
人為巴郡守隱唱車山死千餘年矣今初遭堯仁漏無
垠之澤覃及人鬼因民之心號祠永懷神既拜賜榮耀
而又祠貌更新非夙昔比惟是古史亡傳後人無文獨

貞元之十四年平泉令王寬記修祠之因逆數甲子三百十七年矣其語平平願得數字大書深鑱為耐久事由等磨崖以待某諾之五年多難不果念昔未仕時一再禮神神祠居山巔巨石硯礪若屋若潮若鯨鯢若雨觀木老地秀氣象淒清過者畢肅雖暑而寒仁壽廣都平泉三邑之人趨祠下道里適均四方牲牢日至伐鼓坎坎而三邑之奉居多使君庇護亦私仁厚於三邑之人蓋雨暘時若時蟲不犯稼穡不入境無天災屢豐年

然後三邑之人得以富得以壽得以康寧春秋答神惟
恐染盛不潔羊豕不腍幣帛不腆神弗肯燕享歲復迎
神幸其邑旌旗亘野簫吹鉦鼓沸路雲竿角觚魚龍曼
衍之戲雜陳於前比其送如初或時雷殷殷起巖竇少
女習習生木杪雲駸駸出殿垣人以是知飛廉為之清
塵冥師為之灑道矣風馬龍駟戒嚴以發也三邑之人
歌舞歡呼對神之休祭已合社飲福受胙以去予嘗謂
人曰使君為巴中守時未必有此樂也昔人事之未必

如此之盛也蜀自玄德仲雋割據南蠻侵擾崔旰郭英
又劉闢陳敬暄等縱放王衍孟知祥僭偽兵火蕭條當
時靈場飢饉畫出宮寢歆仆草封重臺雨剝像偶巫覡
守者有菜色敢問使君丁茲時意味與今日孰愈治世
典章固已詳備化國日晷由來舒長神其率萬靈扶掖
宗社以億萬斯年陰報天子則神長有此樂也年月日
記

馮隱士碑陰文

崇寧二年跨黿居士以言抵臯羈於武信十一月癸未
舍館主人延之上座顧右廡仆古碣字泚隕不可究訊
其端主人曰昔我先公與皇妣趙厝于妙臺之野凡六
百有七十甲子其季於今三之一也我先祖先君以時
灑掃祭祀無廢日者鄰好不睦乃貪我疆土削我阜城
使我先公皇妣不獲安其宅兆我是以疚心恫首而又
夷我封樹斷我龜趺我是興虞芮之爭以大復圯址庶
幾徼福於先公皇妣今天誘其衷君辱在敝邑俾墜緒

有紀泐石有章我先公皇妣之迹不泯以享食茲土君之惠也敢不以聞亦惟君圖之居士指妙臺以應之曰自有天地便有此山世代變易如更旦暮英靈磨滅如螢腐而此山蘄蘄不損一塵惟種德於人所不知見垂澤於不斬流善於無窮之源故其後必大乃能與此山爭雄噫泉下古人亦已邈矣其行已予不敢以此筆誣也馮氏出畢公高之後在武信為著姓子姓子孫蕃縷不可盡書予今所目名令宣者蓋四世孫珪一流五世

孫天寵一流六世孫前所謂舍館主人者也予酌諸馮
氏方熾而未艾其在武信者散處四境而北郭為多第
舍聯亘櫛鱗若官寺歲賦肩封君而子弟居養未始有
客氣父兄相視如醖醕酥酪然鄉里稱善人以此考泉
下古人足矣昔云必百祀是中可見也至欲使牛羊勿
踐一藹斤斧不樵一木盜不取一坏土不乏人焉其誰
敢欺妄意他日有過者必指而相告曰此大馮君諱延
錫之墓其碑陰有跨黿居士李某之文

墓誌

馮君貺墓表銘

君諱玠字君貺其先畢萬之後子孫食采馮鄉因以為氏世居信都長樂遭時亂離謂三蜀可以偷安而遂之士風尤端慤用禮因卜而家自唐到今幾十世矣曾祖祖父俱不仕君昆弟五人守法度無可訾者余來遂諸人好事時時觸爵羅肯與舉人遊唯不及識君問其兄曰其為人不如吾亡弟君貺問其弟則曰某自知不逮

吾亡兄君貺然則何賢乎君貺蓋馮氏稱高貴而君貺
廉於財富流寡趣尚而君貺厚於義元祐初君母令狐
夫人老且疾君問醫嘗藥未始見惰容既即世哀毀制
行葬畢兄弟約曰我等創鉅少殞父天而令狐夫人孤
苦立門戶目營指聚垂二十年生事日贏有金一阜有
土一畝今室無空虛穉息如管取婦異姓駢首囁嚅口
衆難調脫有么麼離間患在後日盍求便安各營一丘
以老於是辨田宅媿惡區寶貨器服為俾一人從旁典

籌既探所得則帖息不復議君貺笑曰籌所以息爭端
吾兄弟何爭楚人亡弓楚人得之用是已鑿渾沌矣或
曰業已爾君憺然其間後鄉里教子弟必曰馮氏一門
墳簞曷不取法君喜儲書自為兒時已喜賓客他日築
館治花木客至飲以醇酒以家事屬其偶劉一不問儀
觀雖胖偉而几案蕭蕭無一塵與人交有初終同舍生
相繼入仕君方礪毛錐行且決科而以崇寧三年二月
得疾卒年三十六四年月日葬於某所娶劉氏生四子

曰德茶德輝德剛德新君之婦弟子常一日挈德茶來
乞文以誌墓如君貺之賢我知之矣死而不亡者壽也
因系之以銘詩云當門蘭易以殘城頭草霜亦早故君
疑疑馬糞烏衣問馮之賢誰白其眉連珠兄弟礪硃表
玉其中有人生芻一束卜宅西山見葱蘢之佳氣得此
銘詩可含笑而入地

丁夫人墓誌銘

丁夫人蜀州晉原人曾祖延緒祖允懷父宗道皆不仕

母顏氏夫人既笄嫁同郡唐公翊唐氏食口衆夫人烈烈有標度不可親疎公翊儒者挾方書能起危殆戶外之足常滿世間俗醫務肥其室治貴人疾如治其父母用意益精審由貴人金多治富家疾當吐反下延其苦使呼天乞救富家大概吝嗇不如是不肯輸財俗醫貪婪非止一身出門赴召而妻兒婢子已斟酌所得至某州切儲某物某縣輦某物歸曷嘗不然公翊喜風誼恥言錢而夫人又樂於予寒士之失謀者多至其家公翊

坐堂上招客夫人韋構半臂入竈下操刀問幾何自設
食往往舉前筋客才定未始厭公翊介然有古俠氣遇
不當輒瞋目恚恨夫人濟之以寬故親友與其廝役皆
憚公翊而德夫人紹聖元年八月十四日卒年五十一
生三子男環取楊氏女二人長適胡熙運次尚幼夫人
卒之日貧人之婦來弔者且百數哭之慟曰夫人死誰
肯念我我輩即死年月日葬於晉原縣承惠鄉某里祔
先塋之側環從某遊悲涕求銘辭不獲銘曰審如是仁

婦貧益親審如是義客遊自至賢乎哉豈不謂賢也哉
任隱君墓表銘

隱君任某字某遂之小谿人曾祖祖父皆韜翳於德亡
肯出仕者君性安静静而介介而通通而明明而復晦
自髧髦總角時不雜諸兒狎弄挾書趨堂皇聞寂處習
誦三四過畧通大義又易他書頗涉獵經傳班班知頭
足尤嗜黃老招致方士自熊經烏伸鸞舞龜息盡通其
術未嘗銜試於人曰吾自以游戲三尸耳肆意杯酒引

滿無量其醉竟日或三數日日或一食或數日不食家
釀竭亦踰月不問坐一榻四十年不易生事不知有無
娶劉氏先君五年卒劉賢明有聲主祭祀賓客區理內
外攻苦齧淡舉按相春不以針芒事拂君故君得以簡
放為承平散人正古貞耀之流也君一子鉞兩舉進士
文學行義每每得第一推稱二女長適石從聖次適馮
世南孫男三君卒於大觀三年二月葬以四年閏八月
墓在歸善鄉姚興旁之西予嘗論處朝廷易處鄉黨難

使鄉黨稱為善人尤難故孔子曰恂恂似不能言又曰
善人吾不得而見矣得見有恒者斯可矣如隱君所謂
有恒者也自少至老老至死不變其趨向大與世俗人
遠異昔公牛哀病化為虎搏其兄而食之曩人也今虎
也形與心俱化故不知有兄弟季孫揚病目以戟摘其
子中其父曩明也今盲矣無所識見故不能辨父子今
為儒冠動小利害之前自蹈苟且不廉之地愈於公牛
哀季孫揚蓋不恒其所守者然也出入視隱君能無愧

乎鉞以叔和之狀來求銘叔和子端確誠信人也句語
有法不可增損予附之以銘云生者自生化者自化表
而冬葛而夏不尸於棺不騎箕尾神奇則遊陰魂則止
穆然之几一世之安乎庶幾相遇於蒙穀乎曰不也歸
然之墳千載之歸乎求之於天則真也於蒙穀則妄也

李君墓誌銘

李知新字溫卿仙井人曾祖某祖某父某皆晦迹不仕
娶某氏生子楹公年若干以某年月日卒楹舉其喪以

某年月日塋於某所溫卿初遊鄉校頗有推稱朝廷初
革詞賦以經術造士溫卿一再舉不利志鬱鬱不樂兄
弟五人相繼淪亡垂白之親意尤不堪也溫卿出身獨
任家政積錢如阜麓賙鄉閭之貧乏者資親族之亡所
依棲者無有怠意人多義之溫卿於予為袒免之兄而
予事之如親兄溫卿視予猶弟而愈於同腹出之弟其
居近市有問其價茫不知曰物之不一物之情也世權
鹽泉問其入笑而後答曰利之所在人爭取之以去矣

予丁先承事喪謝賓客遊譚子皮故隱讀道佛書安靜
虛簡以延一呼之氣他非予所知也嘗遣子從子游戒
之曰若叔之才吾不能量汝謹事之必有以發汝之蒙
也鄉之人不知予與溫卿善而溫卿之賢鄉之人又未
必能盡知之則其知溫卿者誠不若予之深也推財樂
施敦親好義此居鄉黨之常而其不常有於鄉黨者蓋
孔子所謂善人吾不得而見之而得見有恒者是矣予
於溫卿又何必細舉而書之予來濮陽聞公之喪恨不

能弔今董役梓城方困板築之事櫛走二耕夫來以葬
期請且丐予誌其墓義不可辭故為之銘銘曰天設鼎
嶠立足泉生鹹地穴腹居其中食公餽

任夫人墓誌銘

夫人任氏遂寧縣人也某之子某之孫某之曾孫其系
出詳明有任氏家牒在夫人生長富家得金冲和故姁
媿靜溫而性天虛明肝肺玲瓏八聰四達名物應事機
銚銛利不待倒囊發智高出老師辯士右父母愛之為

擇嘉匹年二十五乃以歸令孤府君某字某者既謝姆
傳車至門扶玉筭歲蕤黃金步搖飛翰之冠光彩照人
閭里盡傾造廟致拜舅姑禮成更衣不復事熏染絕去
鉛膏如懸黎火齊不受垢蟣旦起問安堂上上鋪飲舉
杯按等眉不聞跼跼履聲守禮防恭甚舅姑歎息曰天
錫我孝婦持令孤氏生計金錢出入若有司存賦田別
上下壤豆鍾釜龠升降取予無一芒偏重雖年侵政荒
而令孤家氓隸無有逋逃者皆夫人平時有以存撫之

過厚也元符己卯間再出粟賑饑儲食餓殍待健而遣
今廝役僮奴班班是前日道傍棄兒其慈仁恤物類如
此令孤君晚歲治臺榭日延賢賓客飲以醇酒烹薌擊
鮮不厭久恩夫人韞臂短襦俛首探右飣和鼎鍋機砧
礮然而四座食指更動母楊齒高夫人歲五六歸寧楊
年九十餘立侍其側女母俱垂白迨楊死哭之慟或慰
勉之曰世固有母那得長日許壽者既化則已無重自
苦夫人曰吾覺母老慕之猶有童心吾哀至深不知幾

何時而有詣極也長子昞秀發有清才遊學石室遂客
死夫人念之竟成疾至政和二年五月初吉盟手誦佛
書暮若假寐焉而卒年六十七生三男子昞先夫人十
四年卒昞暉皆俊造士也女適進士任紹孫男三朴松
卓二子奉夫人以三年十二月日葬於某所暉最善某
來乞銘且慟使世人考第愚直某當在第一書夫人之
行底實無所諛矣其生者不必某具書之也銘曰

言采其芝靡蕪蔽山終朝亡芝挾宮而還靈承夫人可

代芝萬宗族稱孝俗厲以勸佩冠陸離禮成無虧玉匪
待環藻藉何為假而食天脫而溝瘠以任為名義死不
易客至如雲日當擊鮮豆觴腴潔君亦粲然曩王譽兒
夜光失一生者幸賢尚爾連璧陵瘦谷肥斯銘永久下
車式之墓在原後

郭孺人墓誌銘

宋子固妻故屯田員外郎郭敏通女為郭氏女二十三
年為宋氏婦二十二年至紹聖改元七月十五日卒以

十月二日葬于依政縣昇平鄉懷恭里宋氏先塋之旁
婦人不與外事無可書誌其生之年死之日足矣然予
哀夫人無子又哀夫人為子固一世糟糠妻子固始登
第軒軒有光華夫人不并享而長榮之可哀也已凡為
書生婦四時伴燈火漏下五更坐觀翻故紙瑟瑟不知
休書生輩有千錢便作眼孔苟無餘然後帖定謁貴官
不見謀科舉不利其咨嗟沮毀使左右索氣如此雖一
日不可人意但為書生婦亦有快樂時屠沽兒豈無盃

盤市道兒豈無衣食相與至白首懵然不知天下有佳
事游宦所及其美處子固已登第調眉山佐夫人伴燈
火勞不償而死予哀之為銘銘曰種一田穗乎而為英
薄言采之嗚呼何人

楊夫子墓碣銘

代柳幾撰

楊夫子諱直方字端甫成都人年五十四卒於大慈寺
生有材無時命也奈何崇寧改元十二月二十日塋於
某所以夫人謝氏祔焉幾與端甫為同堂友忘形爾汝

凡三十年矣治平中文翁石室養士千數風譽錚錚如
褒武者有幾意直承明倚閭奉制要皆是我輩事幾初
冠游其中一日教官命攬羣經日課莫私閱之得端甫
賦快語琅琅如金玉他日端甫得幾賦亦擊節因歎曰
自古所謂擲地有聲者耶遂相為友每試得名輒相甲
乙大尹吳兆庶召還朝堂諸貴客戲求觀蜀玩仲庶答
云惟數本蜀楊柳客求觀吳出端甫與幾賦示之客省
數過歎曰是中不減靈和風流熙寧元豐間朝廷罷詞

科以經取士端甫被送正在優等元祐復詞科士指數
昌言冠秋榜及楊夫子方可已而果然賦流東下爭傳
誦之四海士見端甫必目送之曰此西川賦難題者公
急景下乃爾不幸春官罷歸前此諸道許推維行一人
今大丞相蔡公帥蜀首以端甫塞詔明日田舍老至持
酒賀鄉校議政且曰龍圖公行某事舉某人某事宜矣
得某人矣其為世所推如此端甫為人莊重不妄交蜀
大姓授以師凡從之遊者成市都踵武得官獨端甫不

得命也奈何娶謝氏生三子一女三代不仕曾祖某祖
某父某自端甫死家益寒乞藁積五年不克葬幾糾鄉
里博之始及葬其子虞憲來句銘且知端甫無如幾厚
端甫無如幾銘端甫無易幾雖不敏不敢辭銘曰文章
弄翰天將與之囊以江山之秀富貴浮雲天實靳之域
以槨蒲之壽行以異路某也夫子之死友憲也夫子之
賢後三尺之冢聞然踐跡車過三步腸痛不怨為此銘
詩不忘平生之言藏此銘詩不知其幾千百年

陳隱士碣銘

君諱某字淳老唐廣明中某以羽衛屬扈僖宗西狩卒於蜀子孫家閬中至公十一世矣淳化中賊王鈞寇成都獠李順寇武陽兩川震擾名光人者以勇力捍鬪賊平補遂州別駕過廣安之雲賓愛山水穎異遂築室以居生子德鑒咸若咸若生篆篆生公著公著生公皆隱雲賓雲賓大聚落公數世以恩意賙卹其土人德之指穎川家謂人輒曰此吾土儉歲之黍稷也祁寒之衣

裘也公園機遇事敏於書雖涉獵而無所不讀昔程
士以詞賦君造語清拔易取名不難掇貴仕屬父卒祖
母王母徐齒迫暮不堪墮生公遊學巴蜀間投筆而歸
問田舍事自言孔方兄不至癡我當神我阡陌君宜知
我不愚我五經笥豈忘我自存我料理深藏權時盈虛其
術在計然鷗夷之間產加十倍以故遊士歸之行者必
以贐能飫飽其意士夫揚之義聲落西南籍甚天資純
孝事二堂滋益恭旦旦問安侍洮頰進饍飲趨前為壽

無一日惰欲王與徐年極高王前死死時公已老追慕
毀瘠追事徐奔走左右策翼承顏色翹翹如壯時過者
相語云是中有老萊子徐喪既終制猶衣衰墨或告以
先王制禮賢者不敢過君子制行亦不以已以茲尚人
可乎公應曰吾知喪吾親終身之慕計天地萬物不吾
易也他日卜塚藏地理家互訛謫莫知適從君禱於雲
賓山之神夕夢神指示其所曰吉無逾此遂葬又營石
室其旁謂其子曰異時於此祔我庶幾依吾母若早得

從遊地下為樂不苦也政和元年七月一日以疾卒年六十臨終戒其子越曰汝學以顯親從汝志也不則謹守先業吾家三世一子儉故能足第崇德以當勢無罪以當貴堅強以當名清淨忠正自娛樂則隱非隱不顯猶顯也留二詩以訓卒章有親賢遠小人之戒公再娶皆劉氏前者生子越字居中一女子適王思孫男三公卒之三年十二月某日塋昔自營之墓某伏幕武信清州人或時往來更稱居中賢思一面之吏通謁有居中

名在因倒屣逆之坐久語益溫潤人非虛稱之也為之
賦承德堂詩居中薦以書來丐公銘予辭之曰顧不識
乃翁今囊實居中則翁可知矣銘曰琳公有書可訂不
誣言世忠孝籍之清都若昔隱君事王與徐至行動天
化豈物俱其飛行自在周九洞而流六虛豈遂棲雲賓
者乎

誄

王朝奉誄

皇宋政和三年八月庚申舉故朝奉王公先生塋於縈
川鳳凰臺之原其子庠序發專使奉書參數千言言倍
酸苦覽者墮泪有曰吾先君至行動天愷樂好賢仕為
小官敢言不避要勢位不究德而死吾母安康君誓志
受托以復爵前寃報吾先君庠序受命日夜祇惕今皆
如訓約無負將誅先君而安康君亦以疾薨化又曰庠
十六而孤區區立世正為老母在今餘年何所戀得乎
扁幽堂藏兩玉骨於九泉塋畢幸有弟序在庠即死求

母於地下豈不遂所欲某三覆書辭置之苫席伏地長
慟吾喪吾母更六晦朔居處之容炯炯在目咳唾之聲
如在耳奉觴豆如平常而不復見啜飲嗚呼吾哀無時
而已不忍更聞周彥輩痛切之辭也既誤以某為能言
且辱交幾三十年矣無所追悼以慰二孝友疾燔之以
告先生辭曰

種德必執和氣生祥孝友得封江山增光吹埴與篴擷
荃及蒹義聲爰集于王之屋爾在昔仙居冰雪面顏兄

弟承之居曾閔間先生智明猶照乘珠名物應事老師
不如筮官巴西一割無留園扉靚虛淒然似秋凡三字
邑民不厭德予欲考之石白不泐獄市不擾平反有功
增秩勸能出于帝聰嘉陵漲濤來齧果城大為之防今
猶利民建言茶郵徑通囊封勢官不愛螻誣鑿空歸休
雙谿菊有東道我其淵明辨之不早先生質直務遵正
軌千躋百跲不潰厥志嗚呼哀哉視金如土迺得士心
蒲許二生振于湮沉樂府五言逼李陵祖遺書簡嚴自

我復古安康作配實由戚里輔佐既賢亦曰有子出者
有聞處者達節如彼機雲獨匪其埒先生之化騎星上
穹飛行八荒見之猶龍或趨鴻濛問道忘歸海中神山
抑從安期厭世溷濁蛻身而去舉棺疑輕託靈安所有
功德者死則不喪予為誄詞用慰泉壤嗚呼哀哉

畧

世繫畧

有詳本此
故曰畧

按唐宗室表云李氏同出於帝顓頊高陽氏高陽生大

業大業生女華女華生皐陶皐陶生益益生恩成自皐
陶至恩成世為大理至理徵因官以命族為理氏以直
道不容於紂得罪而死其妻契和氏與子利直逃難於
伊侯之墟食木子得全遂改理為李自此得姓其後數
世秦御史大夫曇乃始別為二族其一隴西其一趙郡
春秋之後典籍揚聲名史冊耀光華者無世無之獨陵
降匈奴而隴西士夫以李氏為恥至周隋則皆望姓膏
梁腴華差第門閥而與崔盧劉鄭相矜甲乙可謂盛矣

至唐則非獨盛而又大也吾祖出隴西房自太宗第十四子曹王明始分焉明生偁材勇過人為諸武所忌誣以罪流劍南家焉偁生昌昌生訓訓生挺挺生宗宗生瑜明皇西狩瑜負圖牒詣行在所抗表自列乃得追附屬籍尋拜長江令卒官而歸葬于眉之丹陵自偁而下世傳一子至瑜始六子睢昵暕曙暎晴暎生二女而絕餘子各有所傳今蜀中諸李悉祖長江而本房則長江第三子暕所自出也他房族屬不能備載今止詳其本支

世次所繫庶易參考耳陳生承光承光生叔徽叔徽生
璜璜生褒右贊善大夫華陽令褒生虔即某之五世祖
也家於陵生智智生延嗣生二子長曰文賀次曰文貴
文貴祀除文賀生四子曰思問無子曰思訓生揆揆生
君俞曰思齊生谷先生舊名九功祈九變斤九章昕九
皋沂曰思明無子自虔而下亦各有女適良家諺曰女
生向外此固逸而不書然則虔遠矣不得而計也延嗣
文賀皆以壽終守道安貧矜恤孤幼父老有稱之者先

君學儒道通班固書立身行事殊有可紀僕欲為傳而未能或曰李氏當有後於陵則振而起之者其在谷也年月日隴西李某記

謹按舊本及李隱士誌銘叔徽無所謂生璜者叔徽三子長曰球次曰璜季曰琳乃見於長江五房世繫圖而唐表又載叔徽二子曰球曰璜以是當知叔徽生璜為無疑矣今從之

欽定四庫全書

跨鰲集卷三十

宋 李新 撰

禱文

樵對

樵歌於途居士遭之聆其噫鳴曰孰為天地而令拘墟
孰為陰陽而多慘舒羲農兮屬階書契兮權輿智力并
噬兮吾誰與俱猛者叱咤辯者囁嚅禿南山兮作偉構
如紫閣兮焉居鬼俯窺兮盜穿窬獵雲夢兮數鮮獲實

九鼎兮臚廚火未燼兮而號狐馬不勝兮人代車器未
敝兮玉歌璵恩甫結而門戶朱寵未殫而腰領殊予之
樵兮何所虞朝游兮披女蘿暮歸兮宿陽阿樵兮樵兮
爾奈何歌既畢居士意其有道者也始趨而即之曰某聞
網羅不設則鳳凰來遊天象清明則野無滯歎觀生之
容貌若虛意者其有所望耶其避地而遊耶奚自愚於
樵乎其生而樵耶其不得已而樵耶樵將愚於生乎敢
問所安生曰若知予之樵乎鄧林之茂斜谷之密牛山

之美梓澤之華實曾不賞予之斤楓楠榿櫨欂櫨材文襄
檀欒楠杞楨枿豫章大而輪困微而毫末修而拂雲廣
而蔭壑予斧鏹然而其尾已焦矣瘿不中規菌不中繩
脆不可以為器弱不可以為柱鴟張其陽蟻腐其陰匠
石之所捐絕椽楔之不足為用予旦不束其隰則夕伐
其本矣枯柏雖小而有棟樑氣喬喬之材足以輸明堂
予挾斤以過泯不敢議况敢戕其生以害其直與芳於
林而困乎樸藪蔽乎幽而不遂秀且將芟夷其左右保

合自拔之場以包含雲漢之章俾作新風雨之時負抱
日月之光樵雖賤不苟為也充詘於樵無所望足猶繭
于城郭非冥適於世者也顧予豈愚於樵乎衣食于樵
而安之若命直自樂于樵也何為而得已乎不得已乎
樵豈能愚于予乎居士聞其語蹢蹢自失始執其裾命
之曰盍從予歸願請間功欲移生之術於天下之相以
其餘遺一道之使一國之守則賢不肖得所樵之功矣
反振其裾不顧而去

癡虎文

昔過褒斜道遇獵虎者數百人上峻下瞰麾衣服作旌
幟擊鐵木當鉦鼓隘設置罟道置穽機男年十五以上
皆操梃以隨士鼓滿以待殺聲動岩谷勇者六七十人持
長矛執烏莽翳以逢其怒虎一嘯向之數百人者乍離乍
合麾衣服者失手擊鐵木者失器操梃者失便矢鼓滿
者羽箠六七十人者辟易亡色萬有一馬歸而飲至則傷
者扶憊者輿血汗霑衣計其得不能以償予縱觀其傍

為之悽酸會有北客過而抵掌太息曰吁危哉我善其
術不以告若後有獐者苦無以敵矣自吾獵以來所得
不可勝誌荷戟出門而妻子滌釜望臚吾庖厭虎肉室
厭虎皮窮南山之南空西山之西彪然有文者吾狗彘
畜耳雖卞莊子之馳刺子路之徒暴周將軍之搏擊裴
旻之善射權其精諦曾不吾若也且虎訝然而哆者其
穴也塊然而隆者其枕也其潛其出確有常度將遊而
索食則蹲踞于穴門之外眈眈瞪視復入而就穴凡一

再重崖慘陰寒風蕭蕭百獸屏息始偕其穴以去比其
歸坐穴外瞪視如初俛首而入伸其足偃然挾枕以寢吾
俟其出穴之外實腐葉枕之上飴脂膠未即奠安而頷
項之下稍稍不當其意則局縮磨利愈不快則躍而出
哮噬輾踣而腐敗益合不可揮解退入而就穴則氣索
十九矣蓋虎之性決故爪毛有孔竅不欲有所撓拂而
莫知所從受柔附纏著殆不似尋常見輒喪魂魄於是
牙可劇鬚可編頭可料而尾可履矣三尺童子執寸兵

唾手洞宵忍忍受縛凡吾邦之人能此者命之曰癡虎
虎曷嘗癡恃吾有以癡之予每訂之曰天下之士勇勝
怯不勝智智勝勇不勝度鼓勇以奮怯者束手日用其
智則勇者力怯智有時而窮吾之度無窮樂毅屠燕獨
莒即墨未下田單之智固已在毅度內矣騎劫以勇來
而田單之知得行項籍氣蓋軍中一范增之智殆未有
先之者高祖每置二子智勇于度外曠延歲月蔑不與
角草具設而增疑夜半歌而籍亡增怒則發背籍怒則

自劉而高祖之度豁然無所裨損茲豈非癡虎之術耶天
一生水於北水于五事為知虎異為其不知者與知則無
類矣天下之勇幾何而不癡死也耶予可其說間為文

靈泉老詮茶榜

泥牛耕空寶山布種窮盡大千界祇這靈芽試遍第一
泉無此至味舌根知處勝于乳酪醍醐玉塵飛時碾出
山河大地汲取八功德水瓶中已作蒼蠅聲戰退四天
王魔枕上詎成蝴蝶夢要知下口處須是點頭人惟詮

公禪師云何住心是名說法便使千齋日赴也要兩腋
風生大衆事還會麼幾人就鷲峯雲自碧重遊鹿苑日何
長謝師訪臨已後為人不得錯舉

元稹家奴

河南黥徒子以下賤為元稹家奴事稹謹稹倚辦之使
釐瑣務薄有機見稹擢明經第中書判對賢良策第一
聲聞甚譁舉足入捷徑自當無臬閹會宰相不愛貶江
陵士曹稹矜才恃一時人物無我先者班班在臺閣我

反後之膏火日入腸肚內熱求復進家奴往彥之曰得喪命也強飯自聊十口飽煖屬郎郎不幸先朝露奴易主尚可如郎之妻妾子女何稹謝之居數月熱不解奴復往說之曰衣食在身愚人所知奚暇議遠然駕人車同人危啜人漿思人憂尋常理也江陵士冠有可與成事者乎稹曰亡有郎諗監軍崔潭峻者乎曰未諗愚竊覘其人沾沾善人意必能當上心為郎計莫若覆奩中金以奉監軍脂顏面以奉監軍用則郎復用矣郎復用

則天下之金可盡鉤入奩而他人之顏面亦將脂而承君矣野燒在山不禁爆背東薪薦廟要炙手可得耶稹默然久曰古固有之商鞅相秦由景監劉賈王燕由呂澤汝休矣稹更念之自惟前日士良之仇老其齒不能報明日決意奉監軍摩足舐痔罔不到長慶初潭峻入朝大被寵幸首稱稹才可用陛下不當聽姦言斥遠賢者穆宗入其語立詔稹還除祠部郎中遷翰林學士未幾進同中書門下平章事天下不多稹附潭峻得宰相而

多稗奴能謀由非其道雖拏重權安知其非

毒藥論

居士有女五歲死暮得疾暴泄旦下痢數日因不食惟一味仰藥痢止食復進漸有生意精神修擢如尋常他日啟齒酬居士居士顧見斷間巖若蟻穴念不治恐愈作梗三輩走醫醫言脾受病胃虛氣上蒸使然茲不足治居士曰見疹不攻是曲突不徙薪養虎自遺患遂不入其言有同舍每稱秘竒方方不可傳獨可授藥一傳

即瘥居士神之乞半刀圭歸嚴其法經夕而藥毒大作
面色如地唇頥蹇然猶擊寸舌盡裂罅口不得外以薺
芫荽豆甘草之類解之而毒不去病女不復語問疾增
損頷之而已時自捫痛處而呻苦苦者再三宛轉四日

而絕醫視藥云中有砒霜

注按本草味苦酸有大毒

質其人則曰誠

用之亦不多居士始大恨曰誤我誤我我殺之藥殺之
天乎人乎女浪生乎不得其死乎踰月悲不置愛不割
咎藥益甚客過居士曰奚懟對曰懟不得其死者客曰

苗之華樗之老以霜雪死以斤鋸死等死耳安用懟居
士曰擇之不精慮之不熟夫何使吾女至於此極也客
曰藥之毒一夫嘗試之而已固有大於此者安用懟擇
之精慮之熟居士不過取參朮以為良徹烏頭薑蝎
以為不良生死自命雖不精不熟安用懟世有坐朝堂
撻威福種黨與以久其柄而擇之不精慮之不熟其被
毒也小則一家大則數族有居端門職華胥挈銓衡以
司命天下之士而擇之不精慮之不熟其被毒也小即

一邑大則數道海內性命懸執政之手三軍存亡繫大將申令被毒人何止破腦礫胃潰腸出血而已耶甚則虐子孫遠則流數世此而不懟彼又何懟耶擇之不精慮之不熟其毒何止藥而已耶請居士志之亡用懟

過李固鄉偶書

唐識者為諫大夫諱陽城館為隱君子諱浩然亭孔子賢邾儀父賢紀季賢季子季友故書字而不書名賢公孫公子故書氏而不書字賢宰孔賢司馬司城故書官

而不書氏賢夷伯故書諡而不書官夫賢者之名而不諱是天下無可諱者某宦遊至茲竊念太尉之諱與其邑名同自漢到今千有餘歲學士大夫與夫走卒厮養逮其鄉之人獨不為公避何哉太尉名節耀史牘其忠義度越後世陽嘉初對天子斥阿母訶刺外戚抨屏宦官順沖質不永漢祚三絕跋扈將軍利在幼弱太尉專欲立清河王正議蹇蹇迄無一人助胡趙嬖嬖使狂瀾倒翻而羣飛刺天於是國紀斷盡已矣天下事乃有如此

此者餘訓遺烈至其子復不肯立王而其女又能戒變
以遠禍門生故吏亦守義不惑雖千萬世亡進矣噫橋
玄墓下宜沃耐以過車峴首山中嘗見碑而墮淚終藉
當塗之力薄論事以回天庶令行道之人知入門而問
諱况如在之靈雖則無求于當世而好古之士或將有
感于斯文年月日書

書清軒

居士之職十九野次治橋梁一日未歸則串腐貫瞪視

廝役與之圍坐暮投清軒極有媿色祓除土灰友松陰
竹光收召典觀以求復其清而走僮老婢勃翠問家事
新火相交智識不停陷在險宅為清軒主人得乎哉軒
之內無俗書書非俗文其來無俗客客無俗語浪聲潺
潺流莞枕間聽之毛寒自然心開後之游歌安知不笑
居士也哉居士為清軒主人得乎哉

題瑞花圖

李翁既葬其親欲廬墓左或勸以生者待養欲去之重

不忍諸弟更進曰任灑掃之役有某職松楸之守有某約翁歲一再歸古人謂骨肉歸於土至于魂則無不之也父母天地也何國而不戴履葬之明年載家寓武信行年五十與物俱化四十九年之非與夢俱覺旦旦課妻子女共讀海藏書歌往佛名字悉有經程翁所僦屋有花竹負幽憂之苦未嘗一俛首擷而玩之會有袁老子者過而指示其一駢首並秀萼中挺出六綠葉色鵝黃類姚家花光彩射人袁以為瑞馳召工圖之翁哀其

不得地呈露孤陋無賢東道作賦附翁集中矣草木脆
弱旦暮委地惟圖可以傳

贈數者羅公弼

山鬼知一歲事過此不知也大耳通他心寂然不動則
無所通也公弼屈伸數指五行十干引而信之言貴賤
壽夭奇中明驗十八九本儒家者流而為陰陽家流以
道德性命之學而窮刑名度數自妙而入竅宜其術之
高而取名之多也司馬季主隱於卜筮君平為人言忠

孝以此求公弼則得之矣雕龍譚天其放為幻謫曼倩射覆其餘為詆諧以此方公弼則似之矣請子倒金過而問焉

策問

制而用之謂之法推而行之存乎人有天下者嘗患乎法之不立法立矣又患乎不得其人而行之此後世所以企古人為難又恨治功之邈也皇上攬政六年於此矣祇循前烈考古建極善者因之弊者革之潤色其已

立者創修其未立者播之方冊若揭日星則法陶然矣
然議者猶以謂實利未加乎民而有徒事虛文之誚今
欲有司百執皆純明篤實之士曉然知朝廷立法之意
推而行之使斯民均被實利而無徒事虛文之誚將取
之以何道試之以何術願詳著之以待上問而發焉



